



INTERNATIONAL TRIBUNAL FOR THE PROSECUTION
OF PERSONS RESPONSIBLE FOR SERIOUS VIOLATIONS OF
INTERNATIONAL HUMANITARIAN LAW COMMITTED
IN THE TERRITORY OF THE FORMER YUGOSLAVIA
SINCE 1991

TRIBUNAL INTERNATIONAL CHARGE DE POUR-
SUIVRE LES PERSONNES PRESUMÉES RESPONSABLES
DE VIOLATIONS GRAVES DU DROIT INTERNATIONAL
HUMANITAIRE COMMISES SUR LE TERRITOIRE DE
L'EX-YOUGOSLAVIE DEPUIS 1991

Aegon Building, Churchillplein 1, 2501 EW The Hague, The Netherlands Telephone: 31 70 416-5347 Fax: 31-70 -416 5345

Tužilac protiv Miće Stanišića
Predmet br. IT-04-79-PT

JAVNO
ODLUKA

ZAMJENIK SEKRETARA SUDA,

IMAJUĆI U VIDU Statut Međunarodnog suda, koji je Savjet bezbjednosti usvojio Rezolucijom 827 (1993.), a posebno član 21 Statuta;

IMAJUĆI U VIDU Pravilnik o postupku i dokazima, koji je Međunarodni sud usvojio 11. februara 1994., s naknadnim izmjenama i dopunama, a posebno pravila 44 i 45 Pravilnika;

IMAJUĆI U VIDU Uputstvo za dodjelu branioca po službenoj dužnosti, koje je Međunarodni sud usvojio 28. jula 1994., s naknadnim izmjenama i dopunama (dalje u tekstu: Uputstvo), a posebno član 16, 20 i 21 Uputstva;

IMAJUĆI U VIDU Profesionalni kodeks branilaca koji postupaju pred Međunarodnim sudom (IT/125/REV.2);

UZIMAJUĆI U OBZIR da je Mićo Stanišić (dalje u tekstu: optuženi) 11. marta 2005. doveden u sjedište Međunarodnog suda, te da je istog dana, ili približno toga dana, podnio molbu za dodjelu branioca o trošku Međunarodnog suda, uz obrazloženje da nema sredstava da ga plati sâm;

IMAJUĆI U VIDU da je 24. marta 2005., ili približno tog datuma, optuženi od sekretara zatražio da imenuje g. Branka Lukića, advokata iz Srbije i Crne Gore, za njegovog branioca kojeg će plaćati Međunarodni sud, ali da ga je Sekretarijat, budući da je g. Lukić tada postupao u druga dva predmeta pred Međunarodnim sudom, odbio imenovati i pozvao optuženog da izabere alternativnog branioca sa spiska branilaca koji ispunjavaju uslove za dodjelu osumnjičenima i optuženima slabog imovinskog stanja (dalje u tekstu: spisak na osnovu pravila 45);

IMAJUĆI U VIDU da je optuženi 5. aprila 2005. sekretaru dostavio punomoć kojom je opunomoćio g. Lukića da ga pred Međunarodnim sudom predstavlja *pro bono*;

IMAJUĆI U VIDU da je sekretar 9. marta 2006. dobio pismo kojim ga g. Lukić obavještava da želi prestati zastupati optuženog;

UZIMAJUĆI U OBZIR da je optuženi 2. maja 2006. obavijestio sekretara da želi da g. Lukića zamijeni g. Stevo Bezbradica, advokat iz Australije;

UZIMAJUĆI U OBZIR da je 5. maja 2006., postupajući na osnovu člana 11(B) Uputstva, sekretar imenovao g. Bezbradicu za branioca optuženog na period od 120 dana pošto je utvrdio da je privremena dodjela branioca potrebna kako bi se obezbijedilo da pravo optuženog na branioca ne bude povrijeđeno za vrijeme dok sekretar razmatra njegovu sposobnost da plaća branioca;

UZIMAJUĆI U OBZIR da je sekretar, na osnovu člana 11(B) Uputstva, dva puta, 12. septembra 2006. i 28. decembra 2006., produžio imenovanje g. Bezbradice;

UZIMAJUĆI U OBZIR da je sekretar 9. februara 2007. donio odluku o tome da je optuženi sposoban djelimično plaćati troškove branioca, te je imenovao g. Bezbradicu za stalnog branioca optuženog;

UZIMAJUĆI U OBZIR da je 5. marta 2008. Sekretarijat od g. Bezbradice primio obavještenje o tome da ga je njegov klijent zamolio da smjesta prekine sve što radi u njegovo ime i da je optuženi odlučio da se sam zastupa;

UZIMAJUĆI U OBZIR da je Sekretarijat 5. marta 2008. od optuženog primio obavještenje u kojem traži da se g. Bezbradica opozove s dužnosti branioca u njegovom predmetu i obavještava da će se sam voditi svoju odbranu (dalje u tekstu: Zahtjev za opoziv);

UZIMAJUĆI U OBZIR da obavještenje optuženog od 5. marta 2008. predstavlja obavještenje u skladu s pravilom 45(F) Pravilnika da je optuženi odlučio da sam vodi svoju odbranu i da je sekretar o tome obavijestio Pretresno vijeće;

UZIMAJUĆI U OBZIR da se 17. marta 2008. sekretar pismeno obratio g. Bezbradici i pozvao ga da se izjasni o pitanjima koja optuženi postavlja u svom Zahtjevu za opoziv i o njihovom odnosu;

UZIMAJUĆI U OBZIR da je g. Bezbradica 20. marta 2008. dostavio povjerljivi i *ex parte* odgovor na taj dopis, u kojem je odbacio navode optuženog ocijenivši ih lažnim i naveo da se ne protivi tome da se optuženom dozvoli da se na suđenju sam zastupa;

IMAJUĆI U VIDU "Podnesak sekretara u vezi s pravnim zastupanjem g. Miće Stanišića" od 20. marta 2008., "Dodatni podnesak zastupnika odbrane" od 3. aprila 2008. i "Podnesak tužilaštva u vezi s pravnim zastupanjem Miće Stanišića" od 3. aprila 2008., koji su Pretresnom vijeću podneseni povjerljivo;

IMAJUĆI U VIDU da je u više prilika nakon prijema Zahtjeva za opoziv osoblje Sekretarijata bilo u kontaktu s optuženim i razgovaralo o njegovom pravnom zastupanju, između ostalog o njegovoj zabrinutosti u vezi s njegovim glavnim braniocem i mogućnosti da mu se dodijeli zamjena;

UZIMAJUĆI U OBZIR da je 5. maja 2008. za vrijeme sastanka sa zamjenikom sekretara u Pritvorskoj jedinici Ujedinjenih nacija u Haagu optuženi zatražio da mu se g. Slobodan Zečević, advokat iz Srbije, dodijeli za novog branioca kao zamjena;

IMAJUĆI U VIDU da u skladu s pravilom 20(A)(i) Uputstva, sekretar može u interesu pravde opozvati dodjelu glavnog branioca na zahtjev optuženog;

UZIMAJUĆI U OBZIR da je g. Zečević na spisku advokata Međunarodnog suda kvalifikovanih da budu dodijeljeni u svojstvu branioca osumnjičenima i optuženima slabog imovnog stanja prema pravilu 45 Pravilnika i da je napomenuo da je spreman da bude dodijeljen kao branilac u predmet optuženog;

UZIMAJUĆI U OBZIR da je g. Zečević trenutno dodijeljen kao kobranilac u predmetu protiv g. Milana Milutinovića i da je ranije pred Međunarodnim sudom zastupao gospodu Miroslava Deronjića (predmet br. IT-02-61), Momira Talića (predmet br. IT-99-36) i Milana Simića (predmet br. IT-95-9/2);

UZIMAJUĆI U OBZIR da je rasprava s izvođenjem dokaza u predmetu protiv g. Milutinovića okončana 21. maja 2008., da se konačni podnesci odbrane očekuju 8. jula 2008., a završna riječ je zakazana za 22. juli 2008.;

UZIMAJUĆI U OBZIR da je u pismu g. Zečeviću od 15. maja 2008. sekretar izrazio svoju zabrinutost u vezi s mogućim preklapanjem rasporeda predmeta g. Stanišića i predmeta g. Milutinovića, kao i svoju zabrinutost u vezi s eventualnim sukobom interesa koji proizlazi iz još uvijek postojeće obaveze lojalnosti prema bivšim klijentima, te je zatražio od g. Zečevića da razjasni ta pitanja sa Sekretarijatom;

UZIMAJUĆI U OBZIR da je 21. maja 2008. g. Zečević dostavio svoj pismeni podnesak u vezi sa svim potencijalnim ili stvarnim preklapanjima rasporeda i svim sukobima interesa koji proizlaze iz njegovog ranijeg zastupanja drugih optuženih pred Međunarodnim sudom;

UZIMAJUĆI U OBZIR da je g. Zečević Sekretarijatu dostavio nekoliko pismenih podnesaka u kojima u detalje navodi plan odbrane optuženog, između ostalog i to kako namjerava rasporediti svoje vrijeme i vrijeme ostalih članova tima odbrane kako bi izvršili sav preostali pripremni posao i bili u potpunosti spremni da brane optuženog na suđenju;

UZIMAJUĆI U OBZIR da je 5. juna 2008., u skladu s članom 16(G) Uputstva, sekretar uputio pismo optuženom i dao nezavisni pravni savjet u vezi s eventualnom dodjelom g. Zečevića u svojstvu branioca u svjetlu činjenice da trenutno zastupa g. Milutinovića i da je ranije zastupao gospodu Deronjića, Talića i Simića;

UZIMAJUĆI U OBZIR da je optuženi odgovorio 9. juna 2008., navevši da u cijelosti razumije sekretarov savjet u vezi s mogućim sukobom interesa koji proizlazi iz zastupanja bivših klijenata i načina na koji bi to moglo utjecati na vođenje odbrane ako mu g. Zečević bude dodijeljen u svojstvu branioca, te potvrdio svoj zahtjev za imenovanje g. Zečevića;

UZIMAJUĆI, dalje, U OBZIR da su optuženi i g. Milan Milutinović pismeno izrazili saglasnost da g. Zečević zastupa obojicu:

UZIMAJUĆI U OBZIR da je sekretar uvjeren, u skladu s članom 16(G)(ii) Uputstva, da imenovanje g. Zečevića kao branioca dvojice optuženih ne predstavlja preklapanje rasporeda i da nema potencijalnog ili stvarnog sukoba interesa, te da dodjela ne bi na drugi način nanijela štetu odbrani bilo kog optuženog ili integritetu postupka;

UZIMAJUĆI, dalje, **U OBZIR** da je, na osnovu informacija koje je dao g. Zečević, njegovog radnog plana i garancija koje je dao, sekretar uvjeren da će g. Zečević biti dovoljno spreman da na suđenju na odgovarajući način brani optuženog;

UZIMAJUĆI U OBZIR da je zatraženo mišljenje Pretresnog vijeća u vezi sa zamjenom branioca;

UZIMAJUĆI, dalje, **U OBZIR** da, dok bi jednostrani prekid u komunikaciji optuženog s braniocem, posebno neposredno prije početka suđenja, u normalnim uslovima ne bi opravdao opoziv branioca, u konkretnim okolnostima ovog predmeta, sekretar je uvjeren da bi zamjena g. Bezbradice u svojstvu branioca služila interesima pravde i doprinijela očuvanju integriteta postupka;

OVIM ODLUČUJE, u skladu s članom 20 Uputstva, da opozove g. Bezbradicu s dužnosti glavnog branioca i dodijeli g. Zečevića za branioca optuženog s danom donošenja ove odluke;

UPUĆUJE g. Bezbradicu da g. Zečeviću preda sve materijale u vezi s predmetom koje je primio ili podnio za vrijeme svoje dužnosti, u skladu sa svojim obavezama prema članu 9(D) Profesionalnog kodeksa.

/potpis i pečat na originalu/

John Hocking,
zamjenik sekretara

Dana 13. juna 2008.
U Haagu,
Nizozemska